

國朝耆獻類徵初編卷三十三目錄

宰輔三十三

宗室琳甯

勒保

董誥

費淳

國朝耆獻類徵初編卷三十三

通奉大夫前署江西巡撫江西布政使司布政使湘陰李桓輯

宰輔三十三

宗室琳甯

宗室琳甯鑲藍旗人乾隆二十六年由宗人府效力筆帖式補七品筆帖式三十二年遷宗人府經歷三十五年升副理事官三十九年升理事官四十一年授江西道監察御史四十三年兼宗室佐領四十九年轉禮科給事中五十年二月署正藍旗滿洲副都統十月授山海關副都統五十三年遷黑龍江將軍五十四年調吉林將軍五十六年調盛京將軍五十八年偕副都統靈泰等奏

奉天省流寓閩人多在沿海駕駛漁船捕魚生理其中良莠不齊恐有不肖之徒駕船入洋勾引盜匪欽遵 諭旨將流寓閩人編立甲社以杜影射之弊但查沿海漁船有無蓬桅及長寬大小向無定式請嗣後漁船有蓬桅者長不得過三丈二尺寬不得過八尺腰艙不得蓋用蒙板亦不許用雙桅卽單桅不得長過三丈二尺如此定以規式卽不能遠駛入洋有不遵定式者照違制例治罪疏入議行嘉慶四年十一月侍郎鐵保祿康奏奉天旗民人等私開餘地應飭查明 上命琳甯將該處實在情形據實覆奏旋奏言盛京旗民農田其本身地畝之外稍有隙地毗連亦必帶犁開墾首出納糧者固不乏人卽隱匿不報者亦復不少且盛京戶

有首報滋生之條如所首之地較原紅冊地數多者除照數納糧外餘地卽行入官徵租復追繳花利照例治罪是以地畝浮多之戶旣畏罪戾又懼失業遂致隱忍不首冀得僥倖耕種此隱匿浮多地畝之原委也查納糧之地每畝徵糧四合有餘值銀不及二分而納租餘地按其等則折中覈計每畝尙需銀六分兩相較量納糧之數比納租輕四五分是雖有納糧之名並無加賦之累輿情實所樂從合無仰懇 天恩寬伊等私種之罪予限二年令各業戶將浮多地畝自行首報照依紅冊地畝納糧之例一律入冊納糧則旗民人等旣免奪田治罪之虞又無追繳花利之累自必爭先恐後踴躍首出儻有逾限不首及限外私行開墾不隨時首

報者准令地鄰赴官首報丈出餘地卽撥給首告之人耕種納糧
如此辦理所有浮多地畝似可陸續全行首出下部議行五年三
月奉 諭曰前經朕訪聞盛京將軍衙門多有私增番役名爲捕
盜實害閭閻又有浙江人余筠在彼處出入衙門把持地方公務
特親書諭旨密令琳甯將此二事分別查辦旋據琳甯等覆奏已
將番役裁減並將余筠押令回籍茲據瑚素通阿參奏琳甯查辦
番役雖云全行裁退并未斥逐草率塞責看來琳甯竟年老無能
諸事不能整飭著來京另候簡用四月授散秩大臣 賞戴花翎
尋署正白旗漢軍都統閏四月授正紅旗漢軍都統五月授工部
尙書七月 賜紫禁城騎馬六年三月兼署禮部尙書六月調吏

部尙書七年十一月授協辦大學士加太子少保銜八年八月調
正藍旗滿洲都統九年二月 諭曰本年京察屆期吏部開列在
京各部院大臣及各省督撫名單進呈請旨甄別大學士向不開
列第念琳甯參贊綸扉恪勤匪懈交部議敘六月調正黃旗漢軍
都統尋以失察吏部書吏舞弊革任仍畱都統旋授禮部尙書兼
管樂部太常寺鴻臚寺事十一月奏精力就衰懇請開缺調理
允之十年卒 諭曰原任禮部尙書琳甯服官有年勤慎供職上
年冬閒因病乞休茲聞溘逝殊堪軫惜著加恩照尙書例給予卹
典尋 賜祭葬 予謚勤僖子玉慶玉恆玉福玉昌玉英玉慶原
任二等侍衛緣事革職玉福官理藩院左侍郎玉昌官宗人府主

事玉英齊齊哈爾副都統

右 國史館本傳

勒保

勒保費莫氏滿洲鑲紅旗人父溫福大學士定邊將軍自有傳乾隆二十一年勒保由監生充清字經館謄錄二十四年議敘以筆帖式用二十七年九月補中書科筆帖式十一月充軍機章京三十三年京察一等三十四年授山西歸化城理事同知三十七年因延案不結被劾部議革職上念溫福征金川有功特原之以主事用仍在軍機處行走三十八年三月補兵部堂主事六月丁父憂四十年三月遷武庫司員外郎五月兼公中佐領九月服闋十月充寶泉局監督四十二年二月京察一等五月遷武選司郎中四十三年二月授江西贛南道三月調安徽廬鳳道六月丁

母憂回京七月 賞銀庫郎中銜充庫倫辦事章京四十五年五月擢辦事大臣六月遷太僕寺少卿九月服闋十二月擢內閣學士兼禮部侍郎銜四十六年七月授正藍旗漢軍副都統八月賞戴花翎四十八年調正藍旗滿洲副都統尋遷兵部右侍郎均畱庫倫辦事五十年 召來京 命仍在軍機章京上行走五十年五月充右翼監督九月授山西巡撫五十二年七月署陝甘總督十一月奏烏魯木齊巴里坤存營兵丁每歲操演僅有四月閒曠日多技藝難臻精熟請照內地例歲以八箇月爲率火藥鉛斤加倍備辦 上可其奏五十三年七月寶雞縣民雷得本等傳習邪教偽造悖逆經卷訪獲首從各犯治罪如律 上嘉之十一

月實授五十四年十一月奏沔縣界連漢陰地廣難治請分隸漢陰通判管轄裁黃沙驛驛丞改設漢陰巡檢十二月奏嘉峪關外花海子地方緊要請撥兵駐守均下部議行五十六年大兵征廓爾喀道出西甯勒保以辦理駝馬軍裝口糧及口外安設臺站諸事妥協 賞太子太保銜五十七年京察以稱職下部議敘五十

八年奏涼州鎮屬莊浪營所轄俱沿邊扼要舊設參將不足以資彈壓查延綏鎮屬波羅協副將事務較簡請移駐莊浪改爲莊浪協副將卽將莊浪營參將移駐波羅改爲波羅營參將如所請行五十九年十月奏巴里坤鎮屬穆壘營牧廠弁兵向在安西河州靖逆三營內派撥查三營駐劄口外管轄十一營堡一經抽撥稽

察難周請於附近之瑪納斯濟木薩二營內改撥從之先是安徽奸民劉松以習混元教戍甘肅隆德縣復倡立白蓮教惑眾與其黨湖北樊學明齊林陝西韓龍四川謝添繡等謀不軌是月勒保訪獲劉松及其子四兒置之法各省傳教者亦先後就獲上命誅其首惡餘赦免六十年二月京察以勤職下部議敘四月奏安康縣麻柳壩滔河兩處距城寫遠應設營汛請移延綏鎮屬響土堡都司駐麻柳壩漢鳳營屬草涼驛千總駐滔河下軍機大臣議行六月調雲貴總督時間浙總督福康安統兵剿湖南逆苗石三保貴州逆苗石柳鄧等勒保赴軍營安撫正大銅仁鎮遠降苗並督辦軍需嘉慶元年七月以經理糧餉得宜下部議敘八月雲

南威遠廳屬黑裸札那等擾邊境 諭勒保酌帶湖南軍營所調
滇兵馳回剿辦勒保奏雲南兵丁見值攻圍平隴擒拏首逆之時
未便遽撤俟到滇後察看情形如必需兵力再爲檄調 上是之
九月抵滇會巡撫江蘭已平裸匪而湖南軍營統兵大員福康安
和琳相繼卒 上命勒保仍赴湖南偕將軍明亮提督鄂輝等接
辦軍務十月行次貴州適青谿縣教匪高承義等聚眾戕官勒保
奉 旨順道往剿十一月攻克大鬼壘賊巢擒高承義及賊目姚
世高等餘黨悉就殲獲下部優敘十二月緬甸國遣使呈請入貢
勒保以非貢期卻之 諭曰所辦大錯緬甸遠在荒徼聞本年舉
行 授受大典欣逢國慶備物申虔自不應拂其來意況事關外

藩瞻覲勒保卽不得主見亦應將來使畱關暫候請旨辦理乃竟率意徑行將表貢仍交來使帶回阻其向化之誠除已明降諭旨將勒保交部嚴議兼令軍機大臣擬寫檄文將勒保辦理錯謬緣由交江蘭知會該國王外勒保仍著傳旨嚴行申飭見在湖南苗匪剋期擒獲無須勒保再赴湖南著卽帶兵馳赴湖北黃柏山與福甯等會同剿賊立功自贖尋部議革職 上加恩改爲畱任初劉松等雖誅餘黨猶盛潛往來川陝楚三省煽亂於是湖北邪匪首作不靖延及川陝林之華覃加耀聚眾踞長陽縣黃柏山署四川總督福甯攻之不克勒保旋往會剿連戰敗之二年二月乘勝薄坡頭卡俘馘甚眾毀其卡賊巢垂破而貴州南籠府仲苗王囊

仙等叛復 命勒保回黔討之王囊仙者故洞灑寨苗婦當丈寨
苗韋七緒贊以囊仙有幻術羣苗信之推爲首以作亂分遣賊黨
大王公李阿六王抱羊等圍南籠府及府屬之永豐黃草壩捧鮓
新城冊亨安順府屬之永甯歸化各城冊亨旋被陷滇黔道梗三
月勒保率兵五千至以關嶺爲進剿南籠要路卽分剿永豐等處
亦所必經定議由關嶺進兵又防賊苗竄逸令總兵德英額扎郎
阿袁敏分堵東西北三面南面界連滇粵咨兩廣總督吉慶雲南
巡撫江蘭撥兵防守勒保率臬司常明副將施縉等由鎮甯進擊
關嶺凡兩晝夜達關嶺對面之大坡嶺密分兵爲左右隊閒道抄
至關嶺後自統大兵由中路進賊數千人方拒戰嶺後兵突登嶺

賊驚卻大兵乘之殲千餘焚兩旁苗寨殆盡遂克關嶺得 旨獎
賚四月分兵攻巴隴墾下之降葫蘆塋菜子河螞蝗箐等寨一百
五十二關嶺後路肅清乃統兵進克安籠堡抵永甯州城時副將
巴圖什里已解永甯圍都司周廷翰往援歸化廳圍亦解進抵安
南縣提督珠隆阿總兵張玉龍七格以師至勒保令珠隆阿率偏
師從花江募復司擊永豐賊自率張玉龍七格由安姑排沙口趨
新城道經下山塘賊築卡拒冒雨夜攻之立毀卡奪高伍坪等寨
八賊退踞新城外海河橋勒保命縱礮遙擊陽作進攻勢潛遣兵
從下游躡渡襲其後賊大潰新城圍解疾引兵向南籠南籠城西
北碧峯山郡扼要處前爲望城坡賊於坡上樹木城二遏我師夜